

# mainatges d'òc **PLUMALHON**



ISSN 1120-6733 (5,70 €)



**Lo petròli**

**La loira**



# La loira

**S**èm en Africa, dins una ribièra de la forèst eqüatoriala. Una bèstia fila jos l'aiga e puèi nada sus l'esquina. Monta sus la riba e puèi torna cabussar per tornar sortir un vintenat de mètres pus luènh. Es la loira del còl tesselat.

**L**as pus grandas fan al ras d'un mètre de long per un pes de 7 kg. La coa fa un tèrç del còs. La loira a lo pel cort, sarrat, castanh de color, que pòt tirar sul brun fonçat.

Per atrapar los peisses, la loira del còl tesselat a un biais plan particular. Buta lo peis cap a la riba, e l'acantona, que se pòsca pas escapar. Es obligat de sautar per s'escapar. La loira o sap, e quand sauta, la loira l'atrapa abans que torne tombar dins l'aiga.



## Un animal menaçat

**L**as loiras vivon solas o en tropèl d'un desenat de membres al mai. Quand son pas a quistar per s'avitallar, demòran dins lor tuta cavada sus la riba jos qualche tanc.

**E**n Euròpa tanben, se pòt trobar de loiras, mas ne demòra pas gaires. Un còp èra, n'aviá pertot. Ara, s'es destrusit plan endreches ont podían demorar e s'avidar. La pollucion de las aigas tanben lor a fach mal.



*Amb lor coa massissa e lors patas palmadas, las loiras son de nadairas de primièra. Aital pòdon atrapar los peisses, qu'es çò que mai lor agrada.*

